

西方願文解

淨業弟子祿宏著并釋

妙諦法音

A01 總序歸敬 2

 B01 標主 2

 B02 明願 2

 B03 請加 2

A02 正述願文 3

 B01 求生西方正因 3

 C01 發起大心 3

 C02 懺除業障。 3

 C03 立願自要 3

 C04 求佛冥加 4

 C05 淨業成就 4

 B02 得生西方明驗 4

 C01 臨終正念 4

 C02 感佛來迎 5

 C03 往生極樂 5

 B03 已生淨土大用 5

 C01 見佛得記 5

 C02 蒙記具德 5

 C03 成德利生 6

 C04 普皆回向 6

南無本師釋迦牟尼佛

自歸於佛 當願眾生 紹隆佛種 發無上意
自歸於法 當願眾生 深入經藏 智慧如海
自歸於僧 當願眾生 統理大眾 一切無礙

西方願文解

A01 總序歸敬

於中有三：①標主，②明願，③請加。

B01 標主

稽首西方安樂國 接引眾生大導師

稽首者，以首叩地，敬之至也。

西方國土無量，今歸敬者，西方之安樂國也。

安樂，極樂之異名也，或名安養，或名清泰，其義一也。

接，攝取也。

引，指導¹也。

眾生沉淪，接取置之善地。眾生迷昧，指導歸之正途。

凡知識阿羅漢、菩薩、如來，皆接引導師，如畋獵之有虞人²，涉川之有舟長，問路之有土民也。惟佛為群導師之中，大導師也。

大，二意：①普度群靈，無遺失故。②究竟成佛，無退轉故。

B02 明願

我今發願願往生

信行願三，淨土資糧。但言願者，唯信故願。願之切者，必其信之真也。行以願立。願之切者，自能行之力也。

是以《阿彌陀經》中，專說發願願往，不一而足。

B03 請加

惟願慈悲哀攝受

願文備矣。

問古云：「把手牽他行不得，唯人自肯乃相應。」何乃求佛攝受耶？

答①彌陀本願力故。②求佛攝受，正自肯故。③感應道交，正相應故。

1 導，啟發以正道。
2 虞人，官名，掌山澤。

A02 正述願文

B01 求生西方正因

於中有三：①發起大心，②懺悔業障，③立願自要，④求佛冥加，⑤淨業成就。

C01 發起大心

弟子（某甲），普為四恩三有法界眾生，求於諸佛一乘無上菩提道故，專心持念阿彌陀佛萬德洪名，期生淨土。³

先出念佛求生淨土之本志也。

普為者，兼利為懷，不為自身獨求解脫也。

一乘者，佛果為期，不於餘乘妄有希冀也。

發如是心，乃修淨土，是謂正因。苟為不然，雖勤念佛，因地不真，果招迂曲。

四恩者，在家則父母、眾生、國王、三寶。出家則父母、師長、國王、施主也。

三有者，欲有、色有、無色有也。

C02 懺除業障。

又，以業重福輕，障深慧淺，染心易熾，淨德難成。今於佛前，翹勤五體，披瀝一心，投誠懺悔。我及眾生，曠劫至今，迷本淨心，縱貪瞋痴，染穢三業，無量無邊。所作罪垢，無量無邊。所結怨業，願悉消滅。

承上，雖發大心，恐宿世今生，業障多而福慧少，欲淨偏染，故須懺悔。

本淨者，心本自淨，因迷成染，今始覺知，慚愧修省。若本不淨，如銷頑鐵欲成真金，縱經百鍊，終不成就。

三業者，身業、意業、口業也。三業各具貪瞋痴故。

C03 立願自要

從於今日立深誓願：遠離惡法，誓不更造。勤修聖道，誓不退惰。誓成正覺。誓度眾生。

雖已懺悔，不發誓願，是謂有懺無悔。

要者⁴，猶俗云脅制，古曰要君，今自要故。

³ 發菩提心、持名念佛，始與阿彌陀佛之本願相應，方得往生。

⁴ 要者，要約也。

四句，即四弘誓也。遠離句，即煩惱無盡誓願斷也。勤修句，即法門無量誓願學也。誓成句，即佛道無上誓願成也。誓度句，即眾生無邊誓願度也。

C04 求佛冥加

阿彌陀佛，以慈悲願力，當證知我，當哀憫我，當加被我。願禪觀之中，夢寐之際，得見阿彌陀佛金色之身，得歷阿彌陀佛寶嚴之土，得蒙阿彌陀佛甘露灌頂。光明照身，手摩我頭，衣覆我體。

古淨土文，謂：佛以天眼遙觀，天耳遙聞，他心速見故。行人既發大心，佛必證知。既證知已，佛大慈悲，必垂哀憫。既哀憫已，佛大威神，必垂加被。顯如禪觀，幽如夢寐。

所云金色、寶嚴、甘露、光明、手摩、衣覆，精誠之極，感應自然。或不精誠，與精誠未極，則不能也。

然，行人但須一心精誠，不必因此生著作意求現。

C05 淨業成就

使我宿障自除，善根增長，疾空煩惱，頓破無明。圓覺妙心，廓然開悟。寂光真境，常得現前。

既以自力，又蒙佛力，內外交資，故障滅善生，有如是等大利益事。空而曰疾，不勞肯綮修證也。破而曰頓，不歷階級次第也。

了悟圓覺，常住寂光，至是得本淨心，故曰淨業成就。

宿障者，貪瞋痴等。善根者，戒定慧等。妙心真境，言之似分，實則即心即境，即境即心，二而不二。

B02 得生西方明驗

於中有三：①臨終正念，②感佛來迎，③往生極樂。

C01 臨終正念

至於臨欲命終，預知時至。身無一切病苦厄難，心無一切貪戀迷惑。諸根悅豫，正念分明，捨報安詳，如入禪定。

至於者，前修淨因，故至臨終，感斯淨報也。

平日散心雜念，臨行揮霍悵惶。念佛若至一心，臨終安得不定？

然，行人但貴已離貪戀迷惑，勿慮或遭病苦厄難。倘遭病厄，當知念佛人死此往生，如脫敝衣，得換珍服；如出牢獄，得還故家，不亦樂乎！況古云：還有不病者麼，則亦有不厄者。復何慮哉！

病苦者，身所生。厄難者，身所遇。貪戀者，或貪眷屬，或貪財產，不能捨故。迷惑者，心念顛倒，如不知地獄，而曰我欲往中，我欲往中故。

C02 感佛來迎

阿彌陀佛，與觀音、勢至，諸聖賢眾，放光接引，垂手提携，樓閣幢幡，異香天樂，西方聖境，昭示目前。

令諸眾生，見者聞者，歡喜感歎，發菩提心。

經云：執持名號，一心不亂，其人臨命終時，阿彌陀佛，與諸聖眾，現在其前是也。

眾見發心，則自他兼利矣。

又，眾人皆見，其事乃真。獨己見之，或是魔事。

C03 往生極樂

我於爾時，乘金剛臺，隨從佛後，如彈指頃，生極樂國七寶池內勝蓮花中。

上見佛來，今隨佛去。無來去中，而來去也。

勝蓮花者，上上品也。

B03 已生淨土大用

於中有四：①見佛得記，②蒙記具德，③成德利生，④普皆回向。

C01 見佛得記

花開見佛，見諸菩薩，聞妙法音，獲無生忍。

於須臾間，承事諸佛，親蒙授記。

上言平日求生，臨終得生，然豈徒得生而已乎。

今言得生之後，親蒙佛記，具足功德，廣度眾生，有如是等大用也。

凡生西方者，花開有遲速，見佛有早晚，悟道有先後。今是舉念即生，生已即花開，即見佛，即聞法，即得忍，即授記也。皆上上品事。

C02 蒙記具德

得授記已，三身、四智、五眼、六通、無量百千陀羅尼門，一切功德，皆悉成就。

疑：如是廣大功德，累劫修習，未必能得。云何一生西方，皆悉成就？

釋：不知萬法唯心。既得一心，何法不得！

文殊般若稱：「念佛為一行三昧。得此三昧，所有多聞、智慧、辯才，遠過阿難百千萬億倍。」餘可知矣。

三身者，法報化身也。

四智者，大圓鏡智、平等性智、妙觀察智、成所作智也。

五眼者，肉眼、天眼、慧眼、法眼、佛眼也。

六通者，天眼、天耳、他心、宿命、神足、漏盡通也。

陀羅尼者，此云總持。

6 C03 成德利生

然後，不違安養，回入娑婆，分身無數，徧十方刹。以不可思議自在神力，種種方便，度脫眾生，咸令離染，還得淨心，同生西方，入不退地。

如是大願，世界無盡，眾生無盡，業及煩惱一切無盡，我願無盡。

然後者，古所謂既生西方，得無生忍已，還來此世，救苦眾生也。

不違而入者，常居九品，常在十方，時時堪忍度眾生，刻刻西方入正定也。

12 還得淨心者，上言「迷本淨心」，此言「昔迷今悟」。如久失方得，得其本有之淨心，非新得也。

願無盡者，前來發起無上大心故，今成滿無盡大願也。

C04 普皆回向

願今禮佛、發願、修持功德，回施有情。

四恩普報，三有均資，法界眾生，同圓種智。

18 初始發心求生淨土，本為四恩三有法界眾生，故今回向亦如是。

西方願文解

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



香港新界屯門藍地青山公路18號妙法寺 <https://www.mfbm.hk>
18 Castle Peak Road, Lam Tei, Tuen Mun, N.T., Hong Kong